

渤海國志

全

己未仲夏

渤海國志

察罕升允題



求	南
恕	林
齋	劉
刊	氏

上海古籍
書店重印

渤海國志序

昔邵陽魏源著開國龍興記謂遼東青海外爲營州有古孤竹之墟肅慎氏之國孤竹在今遼西肅慎則今遼東吉林寧古塔其地自唐爲渤海而鄂多里城去寧古塔三百餘里 聖清發祥之地也渤海建國垂三百年雖迭有廢興而苗裔弗絕終以寢盛流澤滋長也亦神皋靈秀所鍾與涉江先生抗行而希古博辯以披文自丁世述孤窮介潔常怵惕於世變之日紛危亂之日亟以爲人禽慘黷綱維潰崩有不勝其深悲隱痛者其所述作皆有關世運之盛衰非苟爲閎麗恢張者比也今

年成渤海國志四卷曰原始曰紀年曰後紀年凡爲志者八表二列傳三上溯肅慎之始下迄金源滿洲莫不詳載自有此作而渤海一國之史乘乃備焉已國家不幸使邪說橫流凶豎搖毒倡爲離析滿漢之風遂覆宗社使知肅慎肇封遠隆三后以至興京毓聖天遂方昌或者猖狂之說悖逆之行不至是極乎抑余尤有感者數年以來人嗟蕩析愁憂感舊計且無聊回溯盛時若嬰兒之慕慈母游子之悲故鄉有莫知其所以然者先生以是編付余梓諸叢刻中蓋虞其散佚也莊生曰舊國舊都望之暢然雖使邱林草木之繒入之者十九猶

之暢然況見見聞聞者邪吾知先生不能無感也歲在
己未閏七夕吳興劉承幹序於嘉業堂

序


光緒壬午京兆試得人稱盛陶齋結纓於資州素菴采
薇於膠島其屈抑副車崎嶇薄宦而能以文章忠義相
與頡頏者則瓜爾佳元素司馬其人也司馬少時隨侍
式梁先生於揚郡及見何子貞太史長返都門從濮青
士太守講詞章張叔憲駕部談書畫嗣復出吳縣潘文
勤之門遂深於金石考據之學水曹事暇有書人輯略
之編京輦舊聞有天咫偶聞之刻論詩則有香奩集發
微攷史則有洛陽伽藍記鉤沈授讀龍溪鄭氏爲刻叢
書其兩漢三國學案成於斯時鄭氏爲之付梓著作等


身卓然爲滿洲文學之後勁位雖不達名則遠聞近復
出渤海國志見眎不以鍾義爲不學謬使校訂竊謂吾
鄉先正輿地之學不乏專書如圖瑤圃七椿園和簡勤
松文清類皆使車所至裒輯見聞其成書爲較易元素
儉德辟難家鮮藏籍滬俗吝嗇一瓿鮮借渤海故實荒
遐以之問人多瞠目撝舌而不知所對期月之間遽能
巨帙裒然斯爲神勇陶齋已矣素菴憂傷憔悴神明未
衰他日海天清晏兩君儻單車襆被作健東游過畢郢
之舊京訪漢唐之遺跡耳目所及當有補原著所不及
者鍾義未老尙能操不律而從其後也已未秋九月尼

堪楊鍾義序

渤海國地圖

凡加圍者皆今地名其古地名亦大致如是未敢云悉合惟蓋州存疑故未列入圖內





渤海國志目錄

卷一

原始

紀年

後紀年

卷二

地理志

職官志

輿服志

禮樂志

詞命志

姓氏志

風俗志

物產志

卷三

朝貢表

征戰表

卷四

同姓列傳

異姓列傳

子遺列傳

渤海國志卷一

求恕齋叢書

率賓唐 晏纂

吳興劉承幹校

原始

渤海古肅慎也虞舜紹堯首服德化大戴禮記孔子之對謂之四海成王嗣世來賀卽位尙書存賄肅慎之命列於諸侯故周襄王之告諸侯肅慎與燕亳竝稱其爲封建之國等於箕子之封朝鮮太伯之封句吳焉暨乎漢武滅朝鮮以其地爲眞番臨屯樂浪元菟四郡而肅慎之地遂在封域之中東漢以後一隔於公孫淵再淪

於慕容皝於是夫餘句驪濊貊沃沮爭起而據之昔之
形勢始變厥後有挹婁勿吉靺鞨之異稱實則不過一
部之名而肅慎之爲肅慎初未嘗變及夫唐初舍利氏
自立爲震國王唐中宗因封爲渤海郡王而渤海之名
肇矣建國將三百年初滅於契丹再阨於金源重興於
滿洲雖遷變不恆而爲肅慎之苗胄則終古未變也考
渤海出於勿吉勿吉之在南北朝共分七部一曰粟末
部與高麗接二曰伯咄部在粟末北三曰安車骨部在
伯咄東四曰拂涅部在伯咄東五曰室韋部在拂涅東
六曰黑水部在安車骨部西北七曰白山部在粟末東

南渤海之先出於粟末部姓舍利氏及封渤海改姓大氏降及遼金大氏猶有子遺其入高麗者易姓王氏昔唐張建章有渤海國記三卷見於唐志久已不傳爾後諸書略及一二獨唐書及策府元龜所載渤海遺聞尙夥 國朝本之以成滿州源流考下及契丹國志大金國志松漠記聞通志五代會要東國通鑒諸書各有傳述然卒無臚陳渤海一國之事以爲成書者余不自揆竊援昔人契丹國志大金國志之例網羅放失整比舊聞俾後之人得以上考肅慎下接金源滿洲竟委窮原了如指掌足知一代之興其聲名文物蓋有有開必先

者而紬繹其廢興存亡亦足以資鑒於後世矣

紀年

高王祚榮姓大氏舍利乞乞仲象之子也

一統志作齊克仲象

其先爲女真粟末部人粟末因粟末水以爲號卽今松花江也初埶於高麗唐高宗時李世勣滅高麗仲象率

眾保挹婁之東牟山

讀史方輿紀要山在藩州衛東二十里按藩州今奉天世勣滅高麗

直抵王都仲象若保藩州山則應在其北何以云東保按挹婁故地爲渤海之定理府在今鐵嶺以南則東牟者卽盛京之東山今天柱山也以泥河爲境東窮海西鄰契丹築城郭

以居高麗浦殘稍歸之萬歲通天中契丹李盡忠殺營州都督趙麟反仲象與乙四比羽及高麗餘眾東走度

遼水保大白山即長白山之東北依粵婁河一統志作鄂羅河源出吉林安

班和托峰一流入哈達河一流至開原人清河樹壁自固武后封比羽爲許國

公仲象爲震國公赦其罪比羽不受命后詔玉鈐衛大

將軍李楷固中郎將索仇擊斬之時仲象已死祚榮引

殘夷逐去楷固窮躡度天門嶺此嶺當在長白山以東或即錫赫特山北大嶺

祚榮因高麗靺鞨兵拒楷固楷固敗還時契丹封突厥

唐師道梗祚榮卽并比羽之眾恃荒遠乃自號震國王

遣使交突厥地方五千里戶十餘萬勝兵數萬盡得扶

餘沃沮并韓朝鮮海北諸國地唐武后聖歷中稱臣朝

貢中宗時唐遣張行岌來遂遣子門藝入侍睿宗遣使